

III. *Singularia quædam in Cadavere calculoso dissecto reperta, ab Abrahamo Vater, M. D. Pr. Anat. Wittemb. R.S.S.*

JUVENIS studiosus per duos annos Dysuria frequenti laborans, per illud tempus ultra quinquaginta calculos excrevit; quorum plerique sine insigni dolore inter mingendum secesserunt; quidam tamen eorum reliquis majores, pisorum majorum vel phaseolorum magnitudinem habentes, in urethra substerunt, ac manu chirurgi comminuti aut sectione extracti fuerunt. Incidit hic sensim in Marasium totius corporis, ac urgente tussi sicca & Asthmate, accedente insuper tumore pedum œdematoso, tandem pridie ante mortem, lecto affixus, animam Creatori reddidit. Ad sectionem corporis defuncti accedentes, aperto Thorace, pulmonem cum pericardio, diaphragmate & costis, hinc inde concretum, ac in dextro præprimis latere scirrhosum invenimus, in utroque prætereà ventriculo cordis, Polypos insignes, qui truncos vasorum occupaverant. & proculdubio Asthmatis atque insequentis suffocationis, mortisque subitanæ præcipua causa fuerunt.

In abdomine hepar & lien nullo manifesto vitio laborabant; intestinum autem ileon sugillatum erat, & colon in toto suo ambitu, à dextro inde latere, ubi hepatis accumbit, una cum recto, ita constrictum & contractum apparebat, ut vix digiti crassitiem æquaret, nullamque ferè cavitatem interiùs monstraret.

Tandem vias urinarias, utpote officinam tot calculorum visitantes, in renibus atque ureteribus nihil præternaturalis invenimus, in vesica verò tres calculos, pha-

phaeolorum magnitudinem habentes, eos tamen non liberos, sed membrana valida involutos, ac lateri anteriori prope sphincterem adhaerentes deprehendimus, quos in rei memoriam una cum eorum involucro affervo. Unde hæc membrana calculos involvens originem trahat, explicatu difficillimum mihi videtur; quamobrem hac data occasione, flatu per ureterem utrumque immisso, inquisivi, an illa (*viz* membrana) cum ureteribus communicet; & utrum sit ipsa membrana Vesicæ interior, à calculis in ureteribus, inter substantiam Vesicæ incedentibus, una cum uretere, vel hoc rupto, extensa: nihil tamen detegere potui. Hos tamen calculos Dysuriæ non tantùm continuæ, sed etiam propter irritationem perpetuam, constrictionis præternaturalis intestini coli atque recti extitisse, rationi conveniens videtur.

